

# La bandiere furlane tal spazi

*Pe Fieste de Patrie dal Friûl, un gnûf video di YoupalTubo al conte la aventure dal astronoute furlan Gregory Thomas Linteris*

Tal 1997, la Famee Furlane di Toronto e à fate une grande fieste. Ai 4 di Avrîl di chel an, Gregory Thomas Linteris - il prin astronoute di divignince furlane - al jere partît par une mission spaziâl sul Space Shuttle Columbia, puartant cun se la bandiere dal Friûl.

La bandiere cu la acuire furlane le veve vude di doi parincj di so pari, emigrâts tal Canadá e une vore atîfs te associazion: Sara Alfenore e il so om Mario Fava. Tornât su la Tiere, te capitâl dal Ontario a àn metût sù un grant event par celebrâ chê sô imprese straordinarie.

Vuê o vin tornade a cognossi cheste aventure in graciis di Desiree Chiappo Debegnach, une dai youtubers di YoupalTubo: il canâl YouTube in lenghe furlane promovût de ARLeF - Agenzie regionâl pe lenghe furlane.

I protagoniscj dal canâl a son un grup di zovins che a contin il Friûl a 360 grâts midiant di storiis incredibilis. Il video "spaziâl" di Desiree al è stât presentât a Tarcint



Gregory Thomas Linteris

in ocasion de Fieste de Patrie dal Friûl, dulà che l'astronoute Linteris al è intervignût cuntun videomessaç. Gregory al è laureât a Princeton, al à fat un master a Stanford e un dottorât in ingegneria mecaniche e aerospaziâl, par po aventurâsi tal spazi. Vuê al è un ingegnîr mecanic dal NITS - National Institute of Standards and Technology.

I vin domandât di contânus alc di chê sô esperience straordinarie in orbite.

Tacant dal motif che lu à stiçât a vê la bandiere dal Friûl tal spazi, nus à contât che: «*Ogni astronoute al pues puartâ daûr alc di personâl che lu à judât te sô vite. Par chest o soi stât contenton di vê cun me un simbul impuartant dal Friûl, che al rapresente la mê ereditât culturâl e familiâr*».

Gregory al è nassût tal New Jersey di doi emigrâts furlans e propit di lôr, in particolâr dal pari, al à ereditât il leam cu la tiere di divignince, come che nus à contât: «*I miei a jerin doi lavoradôrs, personis gjenuinis e onestis. A crodevin tal boncûr de int e tal vivi cun zentilece. In particolâr, gno pari mi à simpri fat sintî braurôs. Si è dedicât ae comunitât e ae famee. O soi onorât, se o pensi che il Friûl al à dât ai miei gjenitôrs e ai miei parincj chestis cualitâts che o speri, in cualchi mût, di vê ancje jo e di podêlis trasmeti e condividi*».

## Plui di 60.000 visualizacions pal video di Desiree



Debegnach, une des youtubers de clape di zovins furlans (dîs di lôr), impegnâts a contâ lis lôr passions e lis curiositâts dal Friûl tai videos di YoupalTubo, un canâl cun passe 12.500 iscritti.

Il video "La bandiere furlane tal spazi" al à grant sucès ancje sui canâi Facebook e Instagram de Agenzie, dulà che lu àn za viodût in 158.000 e su TikTok, dulà che al è rivât a 190.000 utents. Cui che no lu à ancjemò viodût, lu cjate propit sul canâl YouTube YoupalTubo.

Publicât in rêt ai 3 di Avrîl, propit par celebrâ la Fieste de Patrie, in pôc timp il video "La bandiere furlane tal spazi" al à za fat plui di 60.000 visualizacions cun plui di 2.800 oris di vision.

Al è merit de aventure straordinarie di Gregory Linteris, contade tal stîl dai zovins di YoupalTubo, cun cualchi licence e cun efîets speciâi. Il video, cul lengaç e la vivarosità tipics dal canâl YouTube promovût de ARLeF - Agenzie regionâl pe lenghe furlane, al torne indaûr tal 1997 cuant che la bandiere dal Friûl e je lade in orbite.

La storie di Greg e je contade di Desiree Chiappo